

P. Magistro S. P. Apostolici permittuntur.

(3) S. Eusebius Vercellensis , uti testatur S. Hieronymus Ep. 61. opp. t. 1. col. 346. ed. cit., "omnium psalmorum commentarios hæretici , hominis veritatem in nostrum eloquium licet hæretica prætermittens , optima , quæque transtulerit." Ipse Hieronymus eamdem hanc methodum in quibusdam Origenis libris adhibuit , uti ipse testatur Contr. Ruffinum l. 2. n. 12. col. 542. opp. t. 2. Quantos in hoc eodem opere labores exantlarit Cassiodorus , ignorat nemo , idque Cassiodorus ipse confirmat de Institut. divin. Litter. l. unic. c. 1. p. 540 ed. Rotomag. 1679. Præclara hæc exempla sunt , quæ os obstruare deberent maledicis vituperatoribus Sedis Apostolicæ , quæ similiter emendari jubet libros , in quibus , mali aliquid inesse deprehendit ; & qui hos libros ita emendatos legent merito in Romanos Correctores usurpare poterunt ea Hieronymi verba ep. 84. t. 1. col. 525. ed. cit. "cum hæc rejeceritis , & quasi censoria virgula separaveritis à fide Ecclesiæ , tuto legam cetera , nec venena jam timebo , cum antidotum præbibero." Late in hoc toto argumento versatur Zaccaria cit. libro *Storia polemica delle proibizioni de' libri* , ubi etiam *Dissert. 3.* ab hæreticorum calumniis solide vindicat Sedem Apostolicam , cuius in vetandis libris plena sapientia , prudentia , æquitatis ratio est.

TITULUS VIII.

De Hæreticæ pravitatis inquisitoribus.

- | | |
|---|---|
| I. Fidei , morumque integritas custodienda diligenter est. | VII. X. Vindicatur Tribunal Inquisitionis. |
| II. Ejus rei curandæ causa Tribunal Inquisitionis institutum est. | XI. Omnes hæreses deferre , & hæreticos accusare debent. |
| III. Hujus origo. | XII. Etiam infames testimonium dicere , atque accusare possunt. |
| IV. Congregatio Inquisitionis Romæ , cui præstet Summus Pontifex. | XIII. Juramentum de observando secreto. |
| V. Ad eam graviora ex toto christiano orbe negotia referenda. | XIV. Summa æquitas , ac diligenzia judicij. |
| VI. Inquisitoris munus nihil detrahit Episcopi officio , & potestati. | XV. & XVI. Contra quos iudicet Tribunal Inquisitionis. |

§. I.

Non satis fideli , morumque integritati consultum videatur , si tantum esset exclusa societas illorum , qui à catholicâ veritate discrepant , amotique illorum libri à ma-

nibus catholicorum ; nisi etiam essent magistratus , qui in fidei corruptores inquirerent , pœnisque coercerent , & ea statim removerent mala , quæ universæ societati detrimentum inferre possunt. In omni bene constituta republika suprema lex est ejus salus , & incolumenta , eamque curare maximum est officium ejus , qui reipublicæ præest. An non etiam incolumenta , salusque ecclesiastice reipublicæ , quæ præsertim in fidei , morumque integritate posita est , custodienda erit diligenter , eaque cura , & solicitude ad eum pertinebit , qui huic reipublicæ præpositus est ?

§. II. Ergo Summus Pontifex , cui tota commissa est Catholica Ecclesia , curare in primis debet , ut integras fides , ut errores removeantur , ut inquiratur in eos , qui fidem corrumpunt , statumque ecclesiastice reipublicæ pervertunt. Hæc causa fuit instituendi tribunal , quod Inquisitionis vocatur , quoniam ejus est inquirere in errores , qui contaminare animos catholicorum possunt , eosque à salutaribus doctrinæ pascuis abducere. Initio unusquisque Episcopus in diœcesi sua , vel plures Episcopi in provinciali Concilio congregati in eos , qui in diœcesi , aut provincia orirentur , errores inquirebant (1) ; semper tamen graviora negotia ad Sedem Apostolicam referebantur , atque ita Episcopus , vel Concilium provinciale ad exitum perducendum curabat , quod à Sede Apostolica decretum fuerat (2).

(1) Vide Datinum Altaserra de Jurisd. Eccl. l. 4. c. 3. , & Bianchium Dell' esterior polizia della Chiesa t. 3. c. 3. §. 10. n. 2. & 3.

(2) Confer quæ dixi in Prolegomenis §. 35. , & in not. t. 1. p. 30. & seq. , & l. 3. tit. 4. §. 8. & in not. 1. p. 55. seq.

§. III. Lapsu temporum , cum gravius malum urgere videretur , oportuit Summos Pontifices in eas regiones , in quibus hæresis longe , lateque serpebat , Legatos mittere , qui suam Episcopis opem adjungerent , ut ita facilius perditionum hominum audacia coerceri , & Christiani deterri à peregrinis , pravisque doctrinis possent (1). Sed cum novi quotidie errores erumperent , & numerus augeretur hæreticorum , Legati autem neque semper praesentes es-

sent, neque semper satis aptum malo remedium adhiberent, visum est perpetuos instituere magistratus, qui semper praesentes essent, ac semper in unaquaque regione ad fidei integritatem animum intenderent, erroresque omnes vix natos comprimerent, & repellerent (2). Ita instituti sunt Inquisitores; nimurum probatae pietatis, & doctrinae, viri praesertim ex Dominicanorum (3), aut Franciscanorum familia, qui vicaria funguntur opera Sedis Apostolicae in avertendis, tollendisque erroribus, atque in fide integra, & incolumi conservanda.

(1) Innocentium III. ante exitum saeculi XII., hoc est anno 1198. Raynerium, & Guidonem in Narbonensem provinciam ad retundendos hereticos Legatos misse constat ex ejus ep. 122. et 123. l. 2. t. 2. ed. Baluzii p. 420. Quam autem ob causam hujusmodi homines cum delegata auctoritate in regiones mitteret Sedes Apostolica, ut socii acciderent Episcopis, qui ordinaria auctoritate poterant, ostendunt Innocentii III. litterae ad Cistercienses apud Maniquesium Annal. Cisterciens. t. 3. p. 420. et seq.; quibus quidem consonant historiarunt monumenta.

(2) Quantum boni attulerit, & mali averterit institutio quæsitorum fidei, compertum omnibus est. Nam eorum cura, & diligentia factum est, ut sensim post annum 1300. decreverit in Italia cum primis securarum pestilentia, neque ulla amplius aut nova, aut vetusta heresis apud Italos radices egerit, uti observat Muratorius Antiq. Italic. Dissert. 60. Mirum hiac videri non debet, quod hoc tribunal adeo, sit invisum hereticis, quorum errores, & audaciam comprimit. Vide Richinum in Ven. Monetam Diss. 1. c. 7. §. 5. seq. p. XXXI. ed. Romæ 1743.

(3) Qui primus Inquisitor fuerit à Summo Pontifice constitutus, incertum, controversumque est. Alli cum Maniquesio Cisterciensium Annalium Scriptore manus hec commissum fuisse primum existimat monachis quibusdam ejus Ordinis, praesertim vero Arnaldo, B. Petro de Castronevo, & Rodulfo an. 1204. Innocentii III. auctoritate. Contra alii sunt, qui cum Jacobo Echardo de Script. Ord. Praedie. t. 1. p. 88. ed. Paris. 1719. tantum à Gregorio IX. an. 1231. munus, & nomine Inquisitoris institutum, ac primum ad Fratres Ord. Praed. delatum fuisse arbitrantur. Bollandiani item hoc modo dirimere voluerunt, ajetes nimurum, veriore esse Echardi sententiam si de nomine ipso Inquisitoris queratur, contra vero s' quæstio sit de potestate inquirendi in hereticos in qua totum est positum officium, ac dignitas Inquisitoris, dubitari non posse, quin primum Cistercienses, posteaque S. Dominicus eo numero functi sint. Verum eruditus Annalium Ord. Praed. Scriptores ad ann. 1207. n. 19. seq. certamen integrarunt defendentes, primum Inquisito-

rem fuisse S. Dominicum, laudantque testimonium Petri Cali nobilis, ac vetusti scriptoris, graviterque, & copiose contraria argumenta refutanda suscepunt. Meum non est in hac tanta, quæ inter doctissimos viros agitur, controversia judicium interponere. Hoc tantum dicam, non satis exploratum videri, quod propter heresim Albigensium Inquisitionis Tribunal primum constitutum, quale nunc est, ac plane firmatum fuerit. Res fere, ut in ceteris evenire solet, à quibusdam veluti rudimentis profecta denuo stabilita, absolutaque est. Itaque jam ab anno 1227. Conrado Marpurgensi ex Ord. Praed. à Gregorio IX. munus Inquisitoris ad capiendos, condemnandos, ac postremo judici sæculari tradendos hereticos commissum fuit, uti patet ex Bullario Ord. Praed. t. 1. p. 20. Const. 7. Eodem anno Joanni Salernitano ex Ord. Praed. officium inquirendi in hereticos datum est, uti patet ex Bulla Gregorii IX. apud Annal. Ord. Praed. p. 203. in Not., deincepsque annis consequentibus in pluribus regionibus Inquisitio constituta est, quae de re videndi sunt laudati Annales Ord. Praedie. p. 20. 37. 38. 45. 47., Spondanus ad an. 1228. n. 11. t. 1. p. 101. et ann. 1234. n. 3. p. 116. et ann. 1256. n. 17. p. 200. ed. Lugdun. 1678., Paramus de Orig. Inquisit. l. 2. t. 2. c. 2. n. 7. et seq. et c. 51. n. 10., Albitius Risposta all' istorie dell' Inquisitione pluribus locis. Qui his Tribunalibus per totum orbem diffusis præpositi erant in grabioribus quibusque negotiis aut litteras dabant ad Summum Pontificem, aut ad eum veniebant, ut ejus consilio, & auctoritate rem omnem expedirent. Lredit enim initio nondum ea, quæ nunc est, Supremæ Inquisitionis Congregatio instituta esset, tamen aut ipse Pontifex rebus præter auctoritate, & judicio suo, aut Cardinalem aliquem eligebat, qui rerum omnium curam gereret. Ita Urbanus IV. an. 1263. Cardinalem S. Nicolai in carcere Tulliano generalem Inquisitorem constituit, ut ex vestito Bononiensi authographo deprehendit Pegna in Direct. inquis. par. 3. comm. 11.; similius Nicolaus III. Cardinalem Latinum Ursinium consanguineum suum, Clemens IV. Cardinalem Guillelmum Tholosanum Inquisitorem creavit, ut testatur Paramus Decret. inquisit. t. 2. c. 2. n. 11., atque id quidem à ceteris quoque Summis Pontificibus factum fuisse, credibile est. Decessorum suorum consuetudinem sequutus Paulus III., & Inquisitionis utilitati consulens an. 1542. edita Constitutione Licet ab initio 41. in Bullar. Rom. t. 4. p. 21. 1. p. 211, sex Cardinales elegit, qui in universa christiana Republica super negotiis fidei Comissarii essent, ac generales Inquisitores, atque hunc Cardinalium coetum, seu Congregationem præsse voluit ceteris Tribunalibus ea de re institutis, ad eamque ardua quæque referri, ut ita singula membra cum suo unitatis centro copulentur. Quam Pauli constitutionem PIUS IV. & V. confirmarunt, quorum alter duos addidit Cardinales, idque deinceps SIXTO V. probatum est in Const. Immensa 118. Bullar. Rom. t. 4. par. 4. p. 392. Atque hi sunt octo Cardinales, qui Præside ipso Romano Pontifice, ac pluribus speciebus fidei, & doctrinæ ministris stipati Congregationem conficiunt, quam

S. Officii, aut Supremæ Inquisitionis vocamus, & cuius munera, partesque describit Cardinalis de Luca *in Relat. Cur. Roman.*

§. IV. Sed ut his Inquisitoribus in re tam gravi, qualis est integritas fidei, ea sit copulatio, conjunctioque animorum, ac sententiarum, quæ cum Sede Apostolica, centroque unitatis esse debet, Romæ à Summis Pontificibus institutus est cœtus, seu Congregatio Cardinalium, cui ipse Pontifex præest, & quæ præter ministros, plures habet consultores spectatæ integritatis, atque doctrinæ, quorum opera, atque consilio utuntur Cardinales, ut enucleatius, & diligentius difficiliora quæque expediantur. Hæc Congregatio præest omnibus Inquisitoribus, qui per totum orbem diffusi sunt, atque ad eam cuncti deferunt difficiliora quæque negotia, ut ejus auctoritate, & judicio finiantur. Quod recte, atque sapienter constitutum est, cohæretque nauntrii, & Potestati Summi Pontificis.

§. V. Nam eum esse unitatis centrum, & caput Ecclesiæ, eique à Christo Domino datam fuisse Christianos omnes passendi, docendi, regendi gubernandi plenam (1) potestatem; & ad Romanam Ecclesiam propter potiorem principalitatem Ecclesiæ omnes convenire oportere (2), inter catholicos constat. Quare in unum commune centrum convenire debent ii, ad quos in singulis regionibus fidei custodia pertinet, & quorum est errores in fidem avertere.

(1) Joannes XXV. 15. Synodus Florentina *in Definit.* t. 18. *Concil.* col. 126. *collect.* Labbæi.

(2) S. Irenæus l. 3. *contra Hæres.* c. 3. t. 1. *ed. Ven.* p. 175.

§. VI. Haud tamen Inquisitoris munus quidquam detrahit, Episcopi officio, & potestati. Nam ejus in primis est curam gerere particularis Ecclesiæ, quam regendam accipit. Ergo & ipse fidei integritati consulere debet, atque in errores inquirere, & dare operam diligenter, ne quis è populo sibi commisso à vera, & catholicæ Ecclesiæ probata doctrina abducatur. Officium hoc, & hæc potestas Episcopo non adimitur per Inquisidores (1), sed hi instituti sunt, ut ei opem ferant, ut quas ipse neglexit, partes expleant, ut pluribus subjecta oculis tutior sit in-

tegritas fidei, ut qui unam particularem, & qui totam universalem Ecclesiam regit simul collatis consiliis, & opinibus custodian Religionem, qua nihil Christiano homini antiquius esse debet.

(1) Illud in primis Episcopi est curare diligenter, ne qui contra orthodoxam doctrinam in diœcesim irrepat error, quod diserte scripsit Apostolus *I. ad Timoth.* c. 3. & *ad Titum* c. 1. Itaque nemo dubitat, quin præsentim ad Episcopum pertineat in hæreticos inquirere, atque in eos, qui obfirmato animo in errore perseverant, meritis peccatis animadvertere. Hoc Episcopi officium expressit Auctor epistolæ *ad Episc. Gall. atque Hispan.* Apud Labbæum *Concil.* t. 1. col. 745. *ed. Ven.*, quæ Lucii P. nomen præfert, revera tamen alium habet auctorem, uti ostendit Berardus *Gratiani canones genuini &c. par. 2. c. 20.* Idem statuit Concilium Remense an. 625., vel 630. *Can. 4.* apud Labbæum *tom. 6. Concil. col. 1433.*; ac ne multis utar in re satis nota, Concilium Lateranense *IV. c. 3.* apud eundem Labbæum *t. 13. col. 938.* decrevit, ut Episcopi singulis annis vel per se, vel per Archidiaconos diœcesim lustrant, querantque diligenter, num in ea latitet aliquis hæretica contagione infectus; qui vero hoc officium neglexerint tamquam gravioris flagitiū rei, ac minus digni Episcopatu è gradu dejiciuntur. Lapsu temporum à Sede Apostolica institutum est Tribunal Inquisitionis, sed non ideo Episcopi soluti sunt onere, aut iis adempta facultas est in hæreticos inquirendi, sicuti declaravit Bonifacius VIII *in c. 17. de hæret.* in 6. Nam quisvis Episcopus omni ope, & opera emiti debet, ut pestis hæresecos à sua diœcesi arceatur, idque unum cavere, ut ubi sunt fidei Quæsitores ab Apostolica Sede constituti, nullum ipsis impedimentum inferat, quominus suum munus exercere possint, sed pari studio, & animorum consentione uterque debet in tam salutare opus, incumbere, servata lege, quæ datur in *cit. c. 17.* & in *Clement. 1. cod. tit.* & in *Extravag. 1. de Hæret. int. commun.* Porro tam Inquisitor, quam Episcopus potest resipisci hæretico aut ad se sponte venienti, aut ad suum forum adducto veniam attribuere, & pro utroque foro laxare censuram in quam propter hæresim incidit: & potest etiam eundem hæreticum, postquam suos ejuravit errores, mittere ad simplicem Confessarium, à quo in foro pœnitentiæ absolvatur, quæ absolutio etiam in foro externo prodest. Id ostendit Benedictus XIV. *de Synod. diæces. 1.9. c. 4. n. 3.*, qui deinceps num. 5. seq. illam expedit controversiam, num Episcopus in foro pœnitentiæ absolvere possit reum hæresecos externæ occultæ, quæ nondum ad ejus forum delata est.

§. VII. Fuere semper, & nunc sunt, qui Tribunal Inquisitionis ægre ferant. Nam iis, quibus nulla, aut erroribus infuscata religio est, qui libere genio indulgere cu-

piunt, vitæque licentia delectantur, nonnisi grave, & molestum esse potest tribunal, quod religionem, ejusque sanctitatem, integritatemque custodit, quod errores avertit, quod improbam licentiam coeret (1). Atque hi crudelitatis accusant Inquisitionem, quasi plures ejus jussu dirum in modum necati fuerint. Verum ab judicibus sæculi ex legibus Principium, non à ministris sacrorum reis hæreos supplicium fuit constitutum (2). Quod quidem merito factum est, tum ut Principes tueantur religionem, quam imperio potiorem habere debent, tum ut comprimant audaciam eorum, qui in civili republica turbas excitant, ejusque statum pervertunt.

(1) Mitto generatim hæreticos omnes, quorum in tribunal Inquisitionis magna sunt; semperque erunt querelæ, atque calumniae, & his quidem non parcunt etiam aliqui, qui se catholicos profitentur. Præsertim vero ægre ferunt, atque reprehendunt Tribunal Inquisitionis Voltairius, Rousseus, Bullangerus, Sarpius, Giannonius, Montesquieus, *Esprit de loix* liv. 25. chap. 15. & liv. 26. chap. 11. Auctor libelli, cui titulus *Le manuel des Inquisiteurs*, Scriptores Enciclopediae verb. *Inquisition.*, Cavallarius Inst. Can. par. 3. c. 13., Eybelius libello *Quid est Papa?* quem postremum contra tribunal Inquisitionis impudenter garrientem gravissime exagitat Cl. Mamachius ep. 3. §. 22. t. 1. p. 304. & seq.

(2) Concilium Lateranense can. 3. t. 13. Concil. col. 926. Collect. Labbæi: "Damnati, inquit, hæretici sæcularibus potestatibus, aut eorum, balivis relinquuntur animadversione debita puniendi." Eodemque recidit, quod à Gregorio IX. contra Patarenos constitutum est, t. 7. Concil. p. 163. Collect. Harduini. Leges autem Imperatorum, quibus contra hæreticos capitales penæ indicuntur; multæ sunt, & hoc porro spectant leges Constantini M. apud Socratem Hist. l. 1. e. 9. p. 31. & Sozomenum l. 1. c. 21. p. 40. cit. ed. Cantabrig., Theodosii M. quæ est l. 9. cod. Theod. de hæret., Arcadii quæ est l. 34. cod. eod. Theodosii Jun. p. 3. Actor. Synod. Ephesinæ, t. 3. Concil. col. 1603. Collect. Labbæi, Marciani par. 3. Actor. Synod. Chalced. c. 6. t. 4. col. 1786. Istis quidem legibus contra hæreticos, eorumque fautores capitales penæ constituuntur. Erunt igitur crudelitatis accusandi Imperatores, quæ leges illas tulerunt, & quorum omnium historiæ monumentis celebrate pietas, mansuetudoque est: sed nulla hujusmodi accusatio cadere potest in Inquisitores, qui numquam tale aliquid commiserunt. Quod de ceteris poenis, nimirum de gravissimis jejuniis, de flagellationibus, de aliquot precum formulis ad recitandum propositis jactant Limborchius homo de Remonstrantium secta Histor. Inquisit. l. 1. c. 10. p. 40. ed. Amstelæd. 1602., aliisque similes, id certe nihil immanitatis habet. Sunt

enim omnia multo leviora iis, quæ prioribus, Ecclesiæ sæculis ob multo minora crimina poenitentibus imponi consuerunt: neque aliquis qui reete sentiat, immanes, dirosque prædicet antiquos Patres, qui eas penas constituerunt. Quod si etiam interdum alicui videatur paulo severius actum ab Inquisitoribus, id quidem pietati, curandæque communis salutis sollicitudini, non crudelitati tribuendum est S. Augustinus ep. 91. ad Sextum E. R. Præsbyterum in fine opp. t. 2. col. 709. ed. Ven. 1729. "Profit diu ista districtio, inquit S. Leo M. ep. 15. ad Turribium Asturicen. præf. col. 696. t. 1. opp. ed. Ballerini. Ven. 1753. Ecclæsiastica lenitati, quæ etsi sacerdotali contenta judicio, cruentas res, fugit ultiones, severis tamen Christianorum Principum constitutionibus, adjuvatur, dum ad spirituale nonnumquam recurrent remedium, qui timent corporale supplicium... Ex quo autem inter Sacerdotes Dei, difficiles commeatus, & rari cœperunt esse conventus, invenit ob publicam perturbationem secreta perfidia libertatem, & ad multarum, mentium subversionem his malis est incitata, quibus debuit esse correcta." Ac Synodus incerti loci in Gallia habita anno circiter 860. t. 5. Concil. p. 672. Collect. Harduini. "Lege, inquit, l. 16. Legis Romanæ, lege decreta Damasi, percurre Leonis epistolas, & ceterorum Pontificum, cum de diversis Conciliis ad Imperatores transmissas: revolve Augustorū edicta de hæreticis ad petitionem Pontificum promulgata: scrutare Cæsarum nostrorum capitula, & invenies, quantum profuerit, atque pro sit legum severitas non solum ecclesiastica lenitati, verum totius christianitatis optandæ paci, & colendæ tranquilitati." Quod si in eos, qui monetam adulterant, aut aliorum graviorum criminum rei sunt, licet Principi capitulis poenam constituere, cur non eadem poena constitui poterit adversus eos, qui adulterant, atque corrumptunt sanctissimam religionem, extra quam nemo æternam salutem consequi potest?

§. VIII. Ministri sacrorum tantum quærunt integritatem fidei, & salutem animarum; & ideo suis poenis hoc tantum propositum habent, ut pravæ uniti, alteriusve hominis opinione aliis minime noceant, atque ut ii, qui in errorem delapsi sunt, eum agnoscent, ac detestentur. Quæ in re quis reprehendat Inquisidores, quod omni ope, & opera enituntur, ut arceatur error ab iis, qui integræ fidei sunt? Qui vero in errore sunt, non vi coguntur amplecti religionem, sed potius metu poenæ ab errore deterrentur, ut divino præsidio adducantur ad colendam amore veritatem, quam in discrimen revocaverant (1).

(1) Vetus hæc est conquestio Donatianorum ajentium, penas in hæreticos non esse constituendas, quoniam amore, non vi colenda religio

est. Sed horum ineptiis satisfecit Augustinus Ep. 89. ad Festum & Ep. 185. ad Bonifac. opp. t. 2. col. 219. & seq. & col. 643. & seq. ed. Ven. 1729. Valdensium quoque, præterea Catharorum, Beguardorum, Wiccleffitarum, Hussitarum opinio erat, quod "Deus non vult pseudo-apostolos, & hæresiarchas extingui, sed tolerari, si forte resipiscant, & è zizaniis vertantur in triticum. Quod si non resipiscant, serventur suo iudicii, cui poenas dabunt aliquando. " Quem errorem damnavit Synodus Senonensis an. 1528. t. 19. Conc. col. 1178. cit. coll. extatque hic error n. 33. in eo, quem Synodus ipsa exhibet ibidem, indiculo. Confer etiam ejusdem Synodi exhortationem ad Principes Christianos de elaborando pro hæreticis exterminandis col. 1180. ibid.

§. IX. Quod si aliqui Inquisitores fuerunt aliquando, qui aut decepti, aut auctoritate sua abusi sunt, id quidem unius, alteriusve hominis, non Tribunalis vitium est. Fuerere pluries ex Magistratibus, qui in civium perniciem converterunt potestatem, quam in eorum utilitatem acceperant. An ideo Magistratus omnes abrogandos putabis? Munus Inquisitoris semper committitur viris, quorum spectata habetur integritas, atque doctrina; si quis forte eorum, qui tam gravi funguntur munere, huic deest, superior extat, cuius imperio, & auctoritate omnis mali causa removetur, & qui pares noxae poenas repetit ab Inquisitoribus, qui suo muneri defuerunt (1). Alicubi cum auctoritate Sedis Apostolicæ Assessores etiam adstant è numero laicorum, per quos eorum quoque, quæ ad civilem rem publicam pertinent, ratio habetur.

(1) Vide Eymericum Direct. par. 2. c. 1. p. 112. ed. Rom. 1587. & pluribus aliis locis, ibique Pegnam, & Albitium in eis. Risposta all' Istoria dell' Inquis. di F. Paolo p. 77. seq.

§. X. Est etiam reprehensionis causa injusta, & inanis, quod Inquisitores sunt Regulares, qui forte partium studiis abripi posse videntur. Princípio quid vetat Suimum Pontificem, qui omnium Ecclesiarum curam, & solicitudinem gerit, ex Regularibus familiis, quæ optime de re Christiana meritæ sunt, ac sëpe functæ, cum magna laude sua, & aliorum utilitate, amplissimis, difficilimisque legationibus, eligere viros doctos, & probos, quorum consilio, auctoritate, sapientia ubique integra Religio conservetur? Deinde ab Hispanica Inquisitione Regulares absunt; ubi autem

hi sunt, haud ipsis quidlibet audere licet, cum subsint Supremæ Inquisitioni, cui Pontifex ipse præst, pœnisque gravissimis provisum sit, ne quis eorum à recta judiciorum methodo, à legibus, à veritate, & æquitate discedat.

§. XI. Jam ad tribunal Inquisitionis, omnes, quibus nota res est, hæreses, atque hæreticos aut suspectos hæreticos deferre atque accusare debent. Quod quidem consentaneum est Apostoli præcepto, & legibus, cum quibus omnis bene constituta res publica administratur. Nam Apostoli præceptum est (1), ut omnes attendant iis, qui dissensiones faciunt, & depositum fidei pervertunt, & hinc merito in causa Religionis unumquemque Christianum militem esse oportet, ut in reos majestatis, & publicos hostes omnis homo miles est (2). Leges autem cujusque rei publicæ bene constitutæ sunt, ut omnis civis Magistratus significare debeat, si quis studeat rebus nobis, si in republica turbas excitet; si quid in publicam salutem, tranquillitatemque moliatur, si qui patriæ proditor sit. An quod in civili republica sapientissimis legibus sancitum est, non etiam faciendum erit in republica ecclesiastica, quam suis erroribus hæretici perturbant, & in extremum pene discrimen adducunt?

(1) Epist. ad Rom. XVI. 17. seq.

(2) Tertullianus Apologetici c. 2. p. 3. ed. Ven. 1744.

§. XII. Admittuntur ad accusandum, atque ad ferendum testimonium etiam infames; quoniam omni ope intentum est, ut tam grave crimen, quod Deum ipsum, e jusque religionem oppugnat, coercentur. Ob lesam majestatem humanam infames quoque accusant, dicuntque testimonium; an non idem adversus reos læsæ majestatis divinæ jus recte constituetur? Nihil vero metuendum est ex vitio acausatoris, aut testium; prius quia pœnarum severitate provisum est, ne quis falso accuset, aut testimonium ferat (1); deinde quia nemo accusatoris, ac testium minus idoneorum fide condemnatur. Hæc testimonia, & accusatio faciunt, ut Inquisitores in denunciatum intentos habeant oculos, atque ut querant diligenter, qui ejus mores, quæ vita, doctrinaque sit, & cum re diu multumque quæsita, ex certis monumentis evidenter constat, aliquem

talem revera esse; qualis accusatus est, tum demum contra eum, non propter vitiosos testes, aut accusatorem, sed propter certissimas probationes judicium emittitur.

(1) Adversus falsos accusatores, aut testes, præter spirituales temporales etiam, eaque gravissimæ poenæ sunt constitutæ. Celebris in primis ea de re est Constitutio *In relleximus* 32. Leonis X. data ad Hispaniæ Quæsitores anno 1518. in *Bullar. Roman.* t. 3. par. 3. p. 465. Neque vero has poenas declinare potest quisquis falsam detulit accusationem aut falsum testimonium dixit. Nam quævis accusatio, & quodvis testimonium Inquisitoris excitat diligentiam, ut magno studio, atque cura veritatem quærat. Necessario autem invenienda veritas quærendo est. Unum autem de duobus effici debet, aut ut verum constet esse crimen, & tunc vera accusatio, itemque vera testimonia sunt, aut contra crimen est falsum, & tunc de falso accusatore, falsisque testibus poena sumitur. Si ad hæc advertisset Cavallarius *Inst. Canonic.* par. 3. c. 13. §. 8., haud certe exagitasset Tribunal Inquisitionis, quod omnes ad accusandum, atque ad dicendum testimonium admittat. Nemo enim propter hanc accusationem, aut testimonium condemnatur, & sunt inanitatis plenissima illa ejus verba: "Quæ enim æquitas, quæ justitia esse potest, ubi indiscriminatim, omnes ad accusandum, ubi omnes ad dicendum testimonium admittuntur?"

§. XIII. Accusatoris autem, ac testium nomina non divulgentur, atque omnibus arcani sacramentum impoitum est. Id vero sapienter est constitutum, ut omnis accusatorum, ac testium invidia, metusque arceatur, ut procul absit gratia, favor, seductio, ut liberius judices sententiam ferant, & magis tutum judicium sit. Accedit, quod rerum bene gerendarum anima arcanum est; & ideo in civilibus quoque negotiis, quæ graviora, & difficiliora sunt, arcani lex observatur.

§. XIV. In expendendis causis, judicendisque personis nihil est, quod non plane consonum æquitati sit. Nam mentionuntur, qui etiam hominum cogitationes ab Inquisitione judicari inquiunt (1), qui reos per fraudem, & dolum adduci existimant, ad confitendum crimen, quod nunquam admiserunt, qui eos habere negant defensiones, & beneficium appellationis, per quam editæ sententiae error emendetur. Tantum qui exteriori actu religionem violarunt, poenas luunt, nulla contra ipsos vis, fraus, dolus adhibetur, suas iidem habent defensiones, & eas sane accuratas,

habentque beneficium appellationis ad Supremam Inquisitionem, per quam omne, si quod immerito illatum est, damnum removetur. Imo ea Inquisitionis mansuetudo, & lenitas est, ut qui sponte denunciat crimen suum, & qui illud ab alio accusatus confitetur, ac detestatur, non alias sufferat poenas, quam quæ sunt ad salutem animæ comparatae (2).

(1) Atque adeo falsum est, ab Inquisitoribus etiam hominum cogitationes judicari, ut quivis Confessarius facultatem habeat absolvendi ab hæresi tantum interna, ac sola mente concepta, quæ nullo exteriori signo patefacta est. Nam in hæresi Summo Pontifici reservatum est jus dannæ venie propter censuram, quæ hæresi adjuncta est. Verum Ecclesia sicuti non potest per se directe, & immediate præcipere, aut prohibere actum mere internum, quæ communis est Theologorum sententia, uti docet S. Thomas 1. 2. q. 91. art. 4. q. 100. art. 9. ita non potest censuram constitutere in hæresim, quæ exteriori actu manifeste deprehensa non sit. Consule Benedictum XIV. de *Synod. diæces.* l. 9. c. 4. n. 4.

(2) Confer Pasqualonium *Pract. del S. Offic.*

§. XV. Inquiritur in omnes Catholiceos, qui in religione criminis rei facti sunt; exceptis Principibus, Cardinalibus, Episcopis quorum ea de re crimina ad Summum Pontificem ab Inquisitoribus referuntur. Judæi, & omnes, qui in hæresi, aut in schismate nati, educati sunt, & in ea regione tolerantur, dummodo contra catholicam religionem nihil agant, Inquisitorum judicio non subjiciuntur. Qui aliquid contra catholicam religionem moliuntur, ii tantum propter hoc crimen non propter nativam hæresim, aut schisma meritis plectuntur poenis. Non enim ferendi sunt, qui Principis beneficium, propter quod in ea regione vitam traducere possunt, convertunt in perniciem populi, & religionis, quæ in civitate dominatur (1).

(1) Confer S. Thomam 2. 2. q. 10. art. 9. ad 2. ac vide etiam Cardinalem Albitium cit. *Rispost.* p. 143. & seq., qui solide contra Sarpium tuerit, quæ à Gregorio XIII. ea de re constituta.

§. XVI. Sed non contra hæreticos, & omnes, qui à fide defecerunt, judicium exercet Tribunal Inquisitionis, verum etiam contra illos, qui facinus aliquod, quod manifestam hæresim sapiat, admiserunt. Huc sane spectant divinationes, sortilegium, blasphemia hæreticalis, poligamia simultanea, abusus sacramentorum, sacrarum imaginum injuria; quæ

crimina Deum oppugnant, & catholicam veritatem, gravemque afferunt hæreos suspicionem. Similiter qui libros damnatos legunt, aut vendunt, qui contra Ecclesiæ præcepta vetitis vescuntur cibis erroris, aut pravæ voluntatis suspicionem ingerunt; & ideo judicium Inquisitionis subeunt (1). Quo judicio tenentur etiam Sacerdotes, qui aliquem in Sacramentali confessione ad turpia sollicitant (2), qui que à pœnitentibus exquirunt nomina eorum, quos criminis socios habuerunt (3); quoniam hi sacramenti dignitate, ac sanctitate abutuntur.

(1) Consule Cardinalem Albitum l. c. p. 125. et seq. p. 131. et seq. p. 218. et seq. et p. 246., ubi de his omnibus præsertim contra Paulum Sarpium solide disputatur.

(2) Benedictus XIV. Const. *Sacram. Pœnit.* 20. t. 1. ejus Bullar. p. 30. ed. Ven. 1754.

(3) Benedictus XIV. Const. *Ubi primum* 8. p. 33. et const. *Ad eradandum.* 20. p. 87. t. 2.

TITULUS IX.

De Simonia.

I. *Simonia quid?*

II. *Eius divisio.*

III. *Quomodo committitur?*

IV. *An ei sit locus semper, cum data pecunia est?*

V. *Res spirituales, quæ prætio dari nequeunt.*

VI. *Sponte oblata simonia non inducunt.*

VII. *Cautio in his oblationibus ad-*

hibenda.

VIII. *Simonia palliata.*

IX. *Redemptio vexationis.*

X. *ad XII. Poenæ in simoniacos.*

XIII. & XIV. *An propter ingressum in religionem, & professio- nem religiosam quidquain dari pos- sit?*

XV. *Poenæ propter simonia con- fidentialem.*

§. I.

Proximum hæresi crimen ecclesiasticum est simonia, quam passim canones *simoniaca hæresim* appellant (1). Nomen accepit à Simone Mago, qui primus in lege Evangelica hujus scelerosis auctor fuit; eaque commititur, cum quis pecunia, vel re alia, quæ pretio æstimatur, dat, vel accipit rem spiritualem, aut spirituali annexam. Quin etiam animo contrahitur simonia, quæ *mentalis* dicitur, cum quis

per simulationem officii aliiquid offert collatori, spe beneficii ab eo impetrandi; sed hæc simonia cum intus lateat, non mortalem judicem, sed solum Deum habet ultorem (2).

(1) *Can. 3. 11. 13. 20. 21. 28. 105. 117. c. 1. qu. 1. c. 32. de Simon.* Tertullianus *Apolog. c. 13. p. 13. ed. Ven. 1744.* *ethnicos Deorum* quos se colere profitebantur, revera contemptores, & irrisores fuisse demonstrat, quia nimirum illos vendebant.

(2) *Cap. 33. & 34. de Simonia.*

§. II. Est igitur, quæ humanis punitur legibus, simonia vel conventionalis, vel realis, vel confidentialis. Conventionalis est, quæ tantum pacto constat, sed tamen nulla, vel ex una solum parte rei traditio accessit. Realis est, quando ad pacta factum ipsum accessit, hoc est numerata pecunia, ac per eam spiritualia sunt data, atque hujus criminis rei sunt non modo contrahentes, sed etiam interpres, quos *mediatores* vocamus, sponsores, depositarii. Denique confidentialis simonia contrahitur, cum quis beneficium recipit, ut ejus fructus alteri reddat, aut certo post tempore titulum restituat; aut cum usque ad certam infantis ætatem alicui beneficium tribuitur, ut illud ipse deinceps in adultum transferat. Item reservatio pensionis sine superioris auctoritate, & beneficii renunciatio, servato ad idem regressu, ceteraque hujusmodi pacta, quæ *fiduciaria* vocamus, ad simoniām confidentialē pertinent (1).

(1) *Concilium Tridentinum Sess. 25. c. 7. de Reform.* Pius IV. *Const. Romanum Pontificem* tom. 4. par. 2. p. 191. *Bullar. Roman.* S. Pius V. *Const. Intolerabilis* 117. t. 4. par. 3. p. 67.

§. III. Tribus modis committitur simonia munere à manu ab obsequio, à lingua (1); nam his omnibus modis datur pecunia, vel res, quæ pretio æstimatur. Munere à manu simoniacus est, qui res sacras emit, aut vendit pecunia, cuius nomine continetur quidquid homines in terra possident (2). Munere ab obsequio simoniacus habetur, qui subjectione, vel servitute indebite impensa res sacras obtinet (3); nam hujusmodi obsequium prætio æstimatur. Denique munere à lingua admittitur simonia, cum quid spiritualis, aut quasi iis detur, pro quibus *majorum quispiam rogaverit* (4). Quod adeo verum est, ut simoniacus apud Deum sit, qui digno quidem viro rem spiritualem attri-

Tom. IV.

Na